



Monsieur Claude Wiseler
Präsident vun der Chamber

Lëtzebuerg, den 28. Februar 2025

Här Präsident,

souwéi den Artikel 80 vum Chambersreglement et virgesäit, bieden mir lech, dës parlamentaresch Fro un de Minister fir Educatioun, Kanner a Jugend, de Minister fir Ëmwelt, Klima a Biodiversitéit an un den Inneminister weiderzeleeden.

An enger ganzer Rei Gemengen am Land sinn an de leschte Jore Bëschcrëchen opgaangen, wou d’Kanner de gréissten Deel vun der Zäit dobaussen an der Natur verbréngen. D’Betreiungsstrukturen erfreen sech enger grousser Beléiftheet, well d’Kanner hei an engem interessanten Ëmfeld spillen, léieren an erfuersche kënnen, während déi vill Zäit un der Frëscher Loft gläichzäiteg d’Immunsystem stäerkt a Stress reduzéiert.

Fir der wuessender Demande besser gerecht ze ginn, an an Zukunft méi Kanner d’Méiglechkeet ze bidden, an eng Bëschcrëche kënnen ze soen, huet de Bildungsminister rezent annoncéiert, dass de Bau vu Bëschcrëchen encouragéiert soll ginn. Well et beim Bau vun engem Gebai an engem Bësch ëmmer Ëmweltoplage gëtt, déi musse respektéiert ginn, war et fir d’Gemengen an der Vergaangenheet net einfach, eng Autorisatioun fir eng Bëschcrëche ze kréien.

Andeem Kontext wéilte mir de Ministere folgend Froe stellen:

- A wéi enge Gemenge gëtt et aktuell eng Bëschcrëche am Land?
- A wéi enge Gemengen si Bëschcrëchen am Bau?
- A wéi enge Gemengen si mobil Léisungen, wéi z. B. Roulotten, aktuell am Asaz, fir Kanner zäiteweis d’Méiglechkeet ze ginn am Bësch an d’Schoul oder an eng Crèche ze goen?
- Wéi vill Kanner sinn aktuell an enger Bëschcrëche ageschriwwen?
- Wéi vill Demande vu Gemenge fir de Bau vun enger Bëschcrëche sinn an de leschte 5 Joer beim Ëmweltministère agaangen?
- Wéi vill vun dësen Demandë kruten eng Autorisatioun?
- Wéi vill vun dësen Demandë kruten ee Refus? Aus wéi enge Grënn?

- Bis wéini ass geplangt, dass déi vum Bildungsminister ugekënnegt Gespréicher tëscht de Ministère fir eng eventuell Upassung vun den Ëmweltoplage fir Bëschcrëchen ofgeschloss solle sinn? Ass den Ëmweltminister oppe fir eng zäitno Upassung vum Reegelwierk?

Mat déiwem Respekt,



Francine Closener
Deputéiert



Claire Delcourt
Deputéiert



Gemeinsam Äntwert vum Minister fir Educatioun, Kanner a Jugend, Claude Meisch, a vum Minister fir Ëmwelt, Klima a Biodiversitéit, Serge Wilmes, op d'parlamentaresch Fro Nr. 1993 vun den honorabelen Deputéierte Francine Closener a Claire Delcourt

Ad 1)

Aktuell hunn aacht Bildungs- a Betreuungsstrukture fir Kanner en Agreement, deen eng Ausnameregelung op Basis vum Artikel 23, leschten Alinea, vum geännerte groussherzogleche Reglement vum 14. November 2013 betreffend d'Agremente fir d'Gestionnaire vu Bildungs- a Betreuungsstrukture fir Kanner enthält. Dës Bildungs- a Betreuungsstrukturen sinn a follgende Gemengen: Diddeleng, Esch-Uelzecht, Fréiseng, Helperknapp, Fiels, Schengen, Schëffleng a Steesel.

An dësem Kader léisst sech festhalen, datt vun den aacht ausgestallten Agrementen der siwen u Bildungs- a Betreuungsstrukture fir kleng Kanner (0-4 Joer) vergi gi sinn, während een Agreement u Bildungs- a Betreuungsstrukturen am Schoulkandberäich ausgestallt ginn ass.

Zousätzlech kann een hei déi verschidde Mini-Crèchen erwänen, déi ënnert d'groussherzoglecht Reglement vum 19. Oktober 2018 betreffend d'Agremente vu Mini-Crèchè falen. Zur Zäit hunn sech véier Mini-Crèchè mat engem Naturkonzept etabléiert.

Ausserdeem gëtt eng grouss Unzuel Bildungs- a Betreuungsstrukturen, déi zwar net iwwert déi uewegenannten Ausnameregelung verfügen, awer e Bëschkonzept respektiv en Naturkonzept offréieren.

Ad 2)

De Ministère fir Educatioun, Kanner an Jugend (MENJE) huet net systematesch Kenntnis dovun, wann eng Bildungs- a Betreuungsstruktur mat engem Bësch- oder Naturkonzept fir Kanner gebaut gëtt. Aktuell ass de MENJE informéiert iwwer Bildungs- a Betreuungsstrukturen, déi an der Planung sinn zu Knapphouschent an an der Gemeng Nidderaanwen.

Ad 3)

Aktuell ginn et a verschidde Gemenge mobil Léisungen, déi et Kanner erméiglechen, zäitweis am Bësch an d'Schoul oder an eng Crèche ze goen. Dëst Konzept gëtt jee no Gemeng op verschidde Manéieren ëmgesat. Zu Schëffleng gouf beispillsweis en Zelt aus natierleche Materialie speziell fir Kanner am Bësch operéiert. Dëst Zelt gouf vun der ITM ofgeholl an entsprécht deemno allen néidege Sécherheetsnormen.

Ausserdeem gëtt et zu Dippech am Bësch eng Hütt aus natierleche Materialien, déi ë. a. fir Kanner aus Bildungs- a Betreuungsstrukturen opgeriicht ginn ass. Grondsätzlech ginn et a ville Gemengen uechtert d'Land mobil a fest Installatiounen an de Bësch, déi am Accord mam lokal zoustännege Fierschter vu Kanner aus Bildungs- a Betreuungsstrukture mat Naturkonzept genotzt kënnen ginn.

Ad 4)

Den Ament sinn ëm déi 350 Kanner a Bildungs- a Betreuungsstrukturen ageschriwwen, déi Titulaire vun engem Agreement sinn, deen eng Ausnamereegelung op Basis vum Artikel 23, leschten Alinea, vum geännerte groussherzogleche Reglement vum 14. November 2013 betreffend d'Agremente fir d'Gestionnaire vu Bildungs- a Betreuungsstrukture fir Kanner enthält.

Ad 5)

Esouwäit ewéi aus den informatieschen Informatiounen novollzéibar ass, ass zanter Januar 2020 just eng Demande fir eng „Crèche en Forêt“ agereecht ginn.

Ad 6)

Zanter Januar 2020 ass keng Autorisatioun ausgestallt ginn.

Ad 7)

Am Joer 2020 ass ee Refus ausgestallt ginn. Dëse Refus gouf ausgestallt, well den Zweck vun der Konstruktioun net enger konformer Affektatioun, entspriechend dem Naturschutzgesetz, entsprach huet.

Ad 8)

Wéi am Regierungsprogramm ugekënnegt, ass et eng Prioritéit vum MENJE, den Accueil en nature weider ze fërderen. An dësem Kontext ginn aktuell verschidde Pisten ënnersicht a weiderentwéckelt. En éischte Kontakt ass hiergestallt tëscht den Agente vun de respektiv concernéierte Ministère, mat dem Zil, een Austausch iwwer d'Promotioun vu Bildungs- a Betreuungsstrukturen an der Natur ze realiséieren.

Lëtzebuerg, den 1. Abrëll 2025

De Minister fir Educatioun,
Kanner a Jugend

(s.) Claude MEISCH